



mjesečni Bilten

omladinska mreža bosne i hercegovine

decembar
prosinac
2016.

211

Dragi prijatelji/ce,

Predstavljamo vam decembarskoizdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **182** organizacije i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

www.omladina-bih.net



SADRŽAJ

| | |
|---|----|
| Aktivnosti u decembru 2016. | 2 |
| Planovi za januar 2017. | 6 |
| Aktivnosti članova mreže | 7 |
| Saopštenja/informacije/donatori/pozivi..... | 26 |

Uživajte u čitanju!

AKTIVNOSTI ORC/HCA U DECEMBRU 2016.

Okrugli stol „Volontiranje – izazovi i mogućnosti“

Povodom Međunarodnog dana volontera, a u okviru projekta “Razvoj volonterizma u sjeveroistočnoj BiH”, koji realizuje „PRONI“ Centar za omladinski razvoj Brčko distrikt BiH, u partnerstvu sa Omladinskim komunikativnim centrom Banja Luka i uz finansijsku podršku Američke ambasade u BiH, 5.12.2016. održan je okrugli stol pod nazivom „Volontiranje – izazovi i mogućnosti“. Učesnici su bili predstavnici omladinskih organizacija iz Brčkog, Bijeljine i Tuzle, te predstavnici gradskih uprava navedenih gradova, najbolji volonteri 2016-e godine, predstavnici Američke ambasade u BiH. Kao predstavnici ORC-a Tuzla na okruglom stolu su učestvovali: Miralem Tursinović (direktor organizacije), Merita Sokoli, Nedim Osmanović i Ivana Jokić.



Ciljevi projekta o kome se govorilo “Razvoj volonterizma u sjeveroistočnoj BiH” su:

- Doprinijeti osnaživanju mladih ljudi i aktivnog građanstva u sjeveroistočnoj Bosni i Hercegovini kroz aktivizam i volonterizam;
- Inicirati izradu i usvajanje Zakona o volontiranju u Brčko distriktu Bosne i Hercegovine i na taj način obezbjediti uspostavljanje institucionalne i zakonodavne podrške za promociju i razvoj volontiranja;
- Promovisati volonterizam kao sredstvo za unapređenje i promjenu društva.

Neki od ciljeva ovog okruglog stola su bili: informisanje javnosti iz sjeveroistočne BiH o ostvarenim rezultatima projekta, važnosti volonterskog rada, širenje svijesti o značaju zakonske legislative za volonterski rad i razvoj saradnje aktera u volonterskom radu.

„Ekipa iz komšiluka – poruka iz provincije“

Mapiranje „Crew from the hood“

Cilj projekta „Crew from the hood“ je izražen kroz motivaciju donosioca odluka za podsticanje aktivne suradnje alternativne kulture, afirmaciju i društveno priznanje za alternativnu kulturnu scenu. Projekat se fokusira na aktivnu alternativnu kulturnu scenu u tri regiona: istočna Bosna i Hercegovina, zapadna Srbija i sjeverna Crna Gora.

Aktivnosti su koncentrirane na dvanaest općina u ova tri regiona i zamišljene kroz planirani razvoj, dijalog sa vlastima, kako i kroz gradnju mreže između aktivistima alternativne kulture. Prvi korak u okviru ovog projekta je mapiranje. U tu svrhu je održan prvi sastanak sa lokalnim vlastima u gradu Bijeljini. Sastanku, održanom u gradskoj kući Bijeljina, 12. Decembra, prisustvovali su direktor ORC-a Miralem Tursinović, koordinatorica Omladinske grupe ORC Ivana Jokić, te Ljubica Mladenović kao predstavnica gradske uprave grada Bijeljine i Nermin Zejnilović, umjetnik iz Bijeljine. Na sastanku su predstavnici ORC-a predstavili projekt i zatražili odobrenje da ga se provede u Bijeljini. Osim toga govorilo se o potrebnim pravnim dozvolama za korištenje dodjeljenog prostora te svakoj drugoj podršci koju su vlasti u mogućnosti pružiti u tom trenutku. Dogovoreno je da će iz Bijeljine dostaviti raspored kulturnih događanja za period kada se projekat planira održati, te spisak sa imenima i kontaktima mladih neafirmiranih umjetnika iz tog područja kako bi se s njima blagovremeno moglo stupiti u kontakt. 22. Decembra potpisan je i Memorandum o saradnji između ORC Tuzla i Grada Bijeljina (gradonačelnik Mićo Mičić) na realizaciji projekta.

18. Decembra je održan sastanak sa stručnim referentom za problematiku mladih u Vladi Brčko Distrikta BH, gospodinom Seadom Ušanovićem. Na sastanku je dogovoreno da ORC uputi memorandum o saradnji na realizaciji projekta gradonačelniku Brčko Distrikta BiH, gospodinu Siniši Miliću.

U nastavku aktivnosti planiramo izvršiti posjetu i općini Živinice.

Omladinska grupa ORC Tuzla

OSCE Sastanak

U prostorijama OSCE-a u Tuzli, 21.12.2016. održan je prvi informativni sastanak u organizovanju koalicije za borbu protiv govora mržnje na području Tuzle, u okviru OSCE Mission to Bosnia and Herzegovina programa „Super Građanke i Super Građani“. Sastanku su prisustvovali predstavnici nevladinih i omladinskih organizacija, predstavnici institucija formalnog obrazovanja, gradske uprave, predstavnici manjina i dr. Omladinsku grupu Omladinskog resursnog centra je predstavljala koordinatorica grupe, Ivana Jokić. Na sastanku su govorili predstavnici Ftz, Revolta, EYP, pedagozi srednjih škola KŠC, GMS, organizacije žena, predstavnik Roma, te predstavnici ORC-a. Dogovoreno je da će se u 2017. godini održati drugi sastanak, na kome će se detaljnije govoriti o osnivanju koalicije za borbu protiv mržnje u Tuzli.



Konferencija „12 godina prilika za mlade“

U Narodnom pozorištu u Tuzli, 9.12.2016. održana je konferencija „12 godina prilika za mlade“, kojom je Fondacija tuzlanske zajednice proslavila postojanje i rad omladinskih banaka. Konferencija koja je bila motivirajućeg karaktera obuhvatila je govore aktivista koji su u periodu od 2004. godine od kada Omladinska banka i postoji, pa sve do danas uspjeli izgraditi vlastite karijere i postati prepoznatljivi u našem kantonu. Ovim povodom se okupilo oko dvije stotine mladih osoba - nekadašnjih članova odbora omladinskih banaka, a danas već ostvarenih i uspješnih ljudi. Među tim mladim ljudima Omladinsku grupu Omladinskog resursnog centra su predstavljale Marija Jokić i Ivana Jokić, koja je i sama bila članica Odbora omladinske banke.



„Moramo se vratiti unazad i pogledati šta smo do sada uradili kako bismo znali u kojem pravcu trebamo ići dalje.“ – kazao je koordinator programa za mlade FTZ-a Mirza Čatibušić. Omladinska banka jeste program podrške idejama i inicijativama mladih koji na poseban način uključuje mlade u život zajednice, te ih motiviše na učešće u pozitivnim promjenama unutar iste, što su najbolje potvrdili i mladi govornici koji su kroz svoje kratke govore istakli kako im je učešće u ovom programu utjecalo na život.

„Još 2004. godine kada smo pokretali program Omladinske banke vodili smo se ciljevima koji se odnose na osnaživanje kapaciteta mladih u svim sferama njihovog djelovanja. Od osnaživanja mladih za samostalno donošenje odluka i djelovanje u lokalnoj zajednici, pa do osnaživanja omladinskog sektora kroz jačanje programskih i organizacionih kapaciteta omladinskih organizacija.“ – prisjetila se Jasna Jašarević, izvršna direktorica Fondacije tuzlanske zajednice.

Training course Novi sad, 10. – 18. Decembar 2016.

Trening course se održao u periodu od 10.12. do 18.12.2016. godine u Novom Sadu u Srbiji. Training course namijenjen mladim radnicima koji su spremni za daljnji razvoj (socijalnog) poduzetništva, vještina mladih i koji podržavaju formiranje različitih društvenih preduzeća sa i za imigrante, izbjeglice i druge mlade s manje mogućnosti. Training course je okupio ukupno 33 učesnika iz 13 organizacija i zemalja (Albanija, Bosna i Hercegovina, Hrvatska, Češka, Francuska, Njemačka, Grčka, Italija, Makedonija, Crna Gora, Srbija, Slovačka i Turska). Bosnu i Hercegovinu je predstavljao član Omladinske grupe Omladinskog resursnog centra iz Tuzle, Suad Murselović.



Novogodišnja proslava omladinske grupe ORC

Kao i svake godine Omladinski resursni centar Tuzla je za svoje omladinke i omladince priredio Novogodišnju zabavu, kojoj su prisustvovali članovi Omladinske grupe. Omladinska grupa je ove godine proslavila četiri godine svoga postojanja sa 30 članova, srednjoškolca i studenta. Tokom četiri godine postojanja Omladinske grupe, možemo ponosno reći da je grupa realizovala veliki broj projekata. Neki od njih su: Date the state, Živi zdrav život vol.1 i vol.2, Djeca u zaleđu, Nedovoljan 1, Dare to stay itd. Na Novogodišnjoj zabavi dobrodošlicu i sretnu Novu godinu zaželio je direktor Omladinskog resursnog centra Miralem Tursinović, te dao svoju podršku i u daljem funkcionisanju Omladinske grupe. Našoj zabavi prisustvovao je i Djeda Mraz, koji je paketićima nagradio naše najaktivnije omladinske i omladince.



U mjesecu januaru 2017. godine Omladinska grupa nastavlja vrijedno da radi na realizaciji projekta „Budi cool i postavi standard“. Ovim projektom Omladinke i Omladinci žele uticati na povećanje svijesti kod mladih o posljedicama uzimanja psihoaktivnih supstanci, povećanje nivoa svijesti o ovom problemu, strukturiranje slobodnog vremena mladih, zdrav način života, te kako se nositi sa stresnim situacijama u porodici, školi i sa vršnjacima. U sklopu projekta realizovat će se edukativno interaktivne radionice u Tuzli i Brčkom. Nešto više o projektu možete vidjeti na stranici Omladinskog resursnog centra Tuzla, a aplicirati na projekat možete putem linka <https://goo.gl/TRBk2K> Ono što na kraju ostaje jeste da Vam zaželimo puno zdravlja, projekata, aktivističkih avantura i uspjeha. Sve najbolje u 2017 godini želi Vam Omladinski resursni centar Tuzla i Omladinska grupa.

Redovne aktivnosti ORC i hCa Tuzla:

Tokom decembra radili smo na održavanju i razvoju komunikacija i koordinacije unutar Omladinske mreže Bosne i Hercegovine (www.omladina-bih.net). U okviru toga smo svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte za narednu godinu.

PLANOVI HCA/ORC-A ZA JANUAR 2017.

- Sprovođenje redovnih aktivnosti kroz Omladinsku mrežu BiH;
- Aktivno učešće u međunarodnoj ALF mreži, održavanje i logistička podrška ALF Mreži Bosne i Hercegovine;
- Pripreme za organizovanje godišnjeg sastanka ALF mreže BiH;
- Nastavak aktivnosti na partnerskom projektu „Crew from the hood – Messages from province“, sa partnerima iz Srbije (Forum građanske akcije – FORCA Požega) i Crne Gore (NGO Fenomeni Kolašin).



Svim našim partnerima, prijateljima, saradnicima u Bosni i Hercegovini i inostranstvu, članovima Omladinske mreže u BiH, Članovima ALF Mreže u BiH, kao i svim čitaocima našeg Mjesečnog biltena želimo sretnu/srećnu i još uspješniju novu 2017. godinu!

Puno zdravlja, sreće, smijeha, ljubavi, lijepih trenutaka, odobrenih projekata, putovanja, upoznavanja.....

Vaši:

Omladinski Resursni Centar (ORC) Tuzla:

Merita, Ivana, Emir, Damir, Miralem

Omladinska grupa Omladinskog resursnog centra Tuzla:

Mirela, Merita, Husein, Slobodan, Adi, Zamire, Emina, Suad, Nedim, Adnan, Edin, Mehmed, Admir, Amila, Samra, Sabina, Muharem, Nedim, Mirnes, Marija, Ivana, Seada, Amina, Dina, Ajla, Lejla, Dženita, Amina, Amna, Melisa, Eldar, Ademir i Jasmina...

AKTIVNOSTI ČLANICA OMLADINSKE MREŽE BiH



MRKONJIĆ GRAD

OO CENTAR – Mrkonjić Grad

Ul. Svetoga Save 1, 70260 Mrkonjic Grad

Tel./fax: +387 50 214 075

Mob. +387 65 710 833

E-mail: centar.mrkonjic@gmail.com

Web: www.oocentar.org

Prije devetnaest godina, 19. decembra 1997. godine, u razorenom Mrkonjić Gradu nastala je Omladinska organizacija "Centar" M. Grad.



Borislav Đurić, izvršni direktor ove organizacije rekao je da nije slučajno to što u nazivu Organizacije ponosno stoji Mrkonjić Grad, jer baš iz te ljubavi prema gradu iznikla je ideja o "Centru", jer je u ljudima koji su započeli tu priču postojala vjera u bolje danas i još bolje sutra.



"Upravo zato ne smijemo zaboraviti te ljude sa vizijom koji su se borili za našu budućnost. Među tim vizionarima, rijetkom sortom ljudi, posebno moram pomenuti upokojenog Stevana Stojičića, profesora, ali prije svega humanistu, koji se hrabro suočavao sa problemima. Dok je on težio da u svakom smislu obnovi život u gradu, otvarajući ga prema svijetu, nije zaboravljao na mlade. Čak šta više, kao čovjeku takvog kalibra, mladi su mu bili prioritet, pa je našao način da zajedno sa njima obnovi Omladinski dom i tako je počela sa radom Omladinska organizacija 'Centar'

Mrkonjić Grad", rekao je Đurić.

Dodao je da su iz tog istog Omladinskog doma, nakon smrti profesora Stojičića i promjene opštinske politike, sramno iseljeni, a sam Dom je nakon nekoliko godina prodan, "pošto su pojedini ljudi, valjda tokom rata, naučili da trguju onim što nam je najvrednije".

"Prve aktivnosti 'Centra' su se odnosile na pomirenje, te promociju Mrkonjić Grada kao prvog otvorenog grada u Bosni i Hercegovini, što je dalo doprinos u pronalaženju sredstava za obnovu grada i duhovni preporod. Jedan od prioriteta bio je da se mladima ponudi alternativa i da se krene ka izgradnji društva koje ne bi počivalo na napumpanim razlikama koje su iskorištene za rat, nego na isticanju sličnosti koje narode koji ovdje žive neraskidivo povezuju, uprkos slici koja se stvara u javnosti, a koja je, pogotovo tih poratnih godina, bila veoma isticana", objašnjava Đurić.



Ističe da je "Centar" u svojih 19 godina postojanja realizovao desetine projekata od opšteg društvenog interesa, pri čemu je neizmerno ponosan na volontere koji su svojim djelovanjem i entuzijazmom iznijeli sve zadatke i ostavili neizbrisiv pečat u našoj zajednici.



"Od tih projekata posebno izdvajamo izgradnju i opremanje dijela Doma kulture. Kroz aktivnosti koje organizujemo u Domu kulture godišnje prođe na stotine mladih. Izdvajamo i projekat: „Doprinos jačanju organizacija civilnog društva u unapređenju položaja ljudi koji boluju od rijetkih (teških) bolesti u BiH", koji je finansiran od strane Evropske unije. Osnivači smo Omladinske mreže Bosne i Hercegovine (jedne od najvećih mreža u državi), Omladinskog savjeta Republike Srpske (krovna organizacija mladih), kao i niza drugih organizacija i mreža. Kroz naš rad dajemo značajan doprinos u rješavanju bitnih društvenih pitanja, što našu

organizaciju čini prepoznatljivom u cijeloj državi, ali što je najbitnije, doprinosi našoj viziji: mladi su postali bitan faktor u kreiranju kulturnog i javnog života zajednice. To nije prošlo nezapaženo, pa smo 2012. godine nagrađeni kao najbolji organizatori volontirana Republike Srpske", kaže Đurić.

Na kraju želi da se u ime Organizacije i u svoje lično ime zahvali svima koji su na bilo koji način učestvovali u razvojnom putu "Centra".



VIJEĆE MLADIH FEDERACIJE BOSNE I HERCEGOVINE

4. viteške brigade 34-36, Ilidza Tel./Fax: +387 33 778-770

E-mail: vmfbih@gmail.com

Web: www.vijecemladih.ba



AKTIVNI i DANAS! je pokazatelj koliko je važan omladinski aktivizam, te koliko su mladi i oni koji rade sa mladima uporni u svom djelovanju.

Mjesec decembar je obilježen aktivizmom mladih u lokalnim zajednicama. Naime, inicijativa Vijeća mladih AKTIVNI i DANAS! koja je počela 01.12.2016. godine promovisala je do danas osamnaest aktivnosti i dvadeset organizacija, institucija i pojedinaca koji u svojim lokalnim zajednicama rade sa mladima.

„Osamnaest aktivnosti koje smo promovisali u sklopu inicijative AKTIVNI i DANAS! je direktno ili indirektno uključilo više od 500 mladih. Ovo je samo mali broj aktivnosti koje smo obuhvatili, a zamislite koliko je njih koje nisu bile promovisane putem Inicijative. Mislim da je ovo dovoljan pokazatelj koliko je omladinski aktivizam zastupljen u BiH i koliko je bitno da lokalne vlasti prepoznaju sve ono što mladi rade, koliko vrijede i koliko se u mlade treba ulagati“, rekla nam je Jasmina Banjalučkić jedna od koordinatorica Inicijative.

Brojne aktivnosti predstavljene u sklopu AKTIVNI i DANAS! su uistinu bile raznolike. Neke od njih su bile bazirane na promociji volonterizma i prava mladih, neke aktivnosti su za cilj imale podstaći aktivizam i poduzetnički duh kod mladih. U sklopu Inicijative promovisali smo i aktivnosti koje su okupile veliki broj mladih, s ciljem osposobljavanja i sticanju novih vještina, okupljeni su bili i profesori s ciljem rada na djelotvornoj komunikaciji u nastavnom planu. Organizovano je i nekoliko humanitarnih akcija kao i niz kreativnih radionica.



„Drago nam je da je Inicijativa prepoznata od strane mladih ljudi i da su i oni uvidjeli potrebu da zajedno pokažemo koliko su mladi aktivni. Ne samo da smo pokazali da smo aktivni u svojim lokalnim zajednicama, već smo pokazali i šarolikost tog aktivizma. Stvarno sam sretan i zadovoljan što smo imali priliku da radimo sa ovako aktivnim i kreativnim mladim ljudima“, izjavio je Adin Pinjo, jedan od koordinatora Inicijative.

U daljem razgovoru Mirela Geko je spomenula da je Inicijativa AKTIVNI i DANAS! samo uvod u ono što Vijeće mladih Federacije BiH namjerava da radi u narednom periodu, te da je ovo bio početak jednog većeg projekta koji je planiran za narednu godinu. „Zaista nam je drago da smo kroz AKTIVNI i DANAS! predstavili brojne organizacije, ali tu ne završava naša suradnja te ćemo u narednom periodu ponuditi ovim organizacijama i novi vid suradnje, a nadamo se i njima zanimljiv.“

Na kraju predstavljamo vam sve organizacije koje su učestvovalе u AKTIVNI i DANAS!, a kako su nam rekli iz VM FBiH ostaje nam još jedna aktivnost koja će biti održana u četvrtak u organizaciji Vijeća mladih općine Novo Sarajevo.

Organizacije koje su učestvovalе u AKTIVNI i DANAS!

1. Vijeće mladih općine Travnik, predstavljanje Zakona o mladima FBiH;
2. Prijatelji Ključa, Humanitarna akcija u organizaciji mladih;
3. Iskoristi dan „Carpe diem“ Ilijaš, Pokreni sebe, volontiraj;
4. Lokalni tim Zavidovići - ASuBiH, „Pet dana volonterizma“, Volontiranje srednjoškolacau institucijama i organizacijama na području općine Zavidovići;
5. Vijeće mladih općine Posušje, Božićni sajam i humanitarna akcija za Petra;
6. Nova vizija i Budi muško klub Travnik, Priča o herojima;
7. Vijeće mladih FBiH, Pravne i organizacijske strukture (USAID i KULT)
8. ORC Dekameron Ključ, Djelotvorna komunikacija u nastavnom procesu;
9. JU OŠ Sanica Ključ, Novogodišnji bazar
10. Vijeće mladih Posušje, Posjeta vrtiću te druženje i podjela paketića najmlađima;
11. Vijeće mladih Gradačac i Vijeće mladih Ključ, Jačanje uloge mjesne zajednice
12. Vijeće mladih FBiH, Skupština u Mostaru;
13. Međunarodni centar za djecu i omladinu Fortis Jablanica, Škola klavira;
14. Omladinska organizacija Svitac Brčko, Kreativne i muzičke radionice;
15. Vijeće mladih općine Orašje, Zapošljavanje osoba sa invaliditetom;
16. Vijeće mladih općine Gračanica i Gračaničko keranje, Mladi, put do uspjeha;
17. Vijeće mladih općine Ključ, Dijalog mladih i vlasti – sastanak sa načelnikom općine;
18. Ambasada lokalne demokratije Zavidovici, Youth taking over day;
19. Vijeće mladih općine Novo Sarajevo, godišnja Skupština.

Budimo AKTIVNI i DANAS! jer #mladismo!





Međunarodni centar za djecu i omladinu FORTIS

Ul. Suljo Čilić bb, 88420 Jablanica

Tel./fax: +387 63 334 993, +387 61 327 427

E-mail: centarfortis@yahoo.com

Web: www.centar-fortis.org

Međunarodni centar za djecu i omladinu "Fortis" već šestu godinu realizuje Školu klavira kao vid neformalnog obrazovanja. Projekat Škole klavira bio je finansiran od Općine Jablanica, Ambasade Savezne Republike Njemačke, Mreže za izgradnju mira, Federalnog ministarstva kulture i sporta/športa, Ministarstva obrazovanja, nauke, kulture i sporta HNK, Turskog Lot-tima, BH Telecom, Hilfe von Mensch zu Mensch. Održan je niz koncerata na temu "Muzički most-Beethoven i sevdah", "Osjesti snagu mira uz Malu školu klavira", "Gala koncert", "Svečani koncert", "Koncert za nastavnicu Azru", "Mali pioniri", "Omladinski susreti kroz klasičnu muziku". Učenike podučava visočki pijanist Bartolomej Stanković.



Cilj je razvijati svijest o kulturi, podsticati nove inicijative u institucionalnoj i subinstitucionalnoj sferi kulture, partnerstvo s drugim sektorima. Kroz korisno iskorišteno slobodno vrijeme mladi dolaze do novih znanja, vještina i kontakata koje mogu iskoristiti za vlastiti napredak.



Svake godine Centar "Fortis" pokušava upriličiti barem jedan koncert klasične muzike u svojoj općini. Ove godine su bila čak dva. Kako bismo obilježili 246. godišnjicu rođenja Ludwiga van Beethovena, upriličili smo manji koncert ovom divnom kompozitoru čija djela se i danas rado slušaju i sviraju. Kao jedan od najvažnijih kompozitora koji je i pored gubitka sluha komponovao vrhunska djela oduševio je muzički svijet i postavio novi standard intelektualnog i emocionalnog jedinstva koji nikad nije bio izgubljen.

Prisjećanje na njegove riječi i kompozicije, učenici Škole klavira i članovi Centra "Fortis" su upriličili ugodno druženje.

- „Odličan umjetnik je najvrijednije blago nacije.“ Ludwig van Beethoven
- „Ovdje postoji i postojat će na hiljade prinčeva; ali je samo jedan Beethoven.“ Ludwig van Beethoven
- „Mnogi misle da se sluša samo ušima. Ja sve tonove čak i vidim.“ Ludwig van Beethoven
- „Oznaka krasnog čovjeka je: Ostati čvrst kada je u problemima!“ Ludwig van Beethoven
- „Muzika je posrednik između duhovnog i osjetilnog života.“ Ludwig van Beethoven

#mladismo "aktivniidanas #centarfortis #vijecemladihfederacije #vmfbih #skolaklavira





Anesa Hidić, član Omladinske mreže, pojedinac

Omladinski krug Kladanj

E-mail: anesahidic@hotmail.com

Održana radionica „Upravljanje konfliktom“

Dana 15.12.2016. godine je u sali Općine Kladanj održana radionica na temu “Upravljanje konfliktom”, na kojoj su učestvovali građani Kladnja i Vlasenice, članovi opštinske radne grupe projekta PRO-Budućnost i predstavnici NVO-a. Cilj radionice bio je sticanje znanja i vještina u prevazilaženju konflikata i stvaranje atmosfere mira i učenje o vještinama nenasilne komunikacije.



Održane edukativno-kreativne radionice za djecu i mlade

U okviru projekta "Mladi su izvor energije", kojeg realizuje neformalna grupa aktivnih mladih iz Kladnja, uz finansijsku podršku Fondacije Shuler Helfen Leben, u proteklim danima održane su edukativno-kreativne radionice za djecu i mlade u prostorijama udruženja "Dječija radost".





Udruženje „Volonteri i prijatelji Konjičke regije“ Konjic

Ul. Civilnih žrtava rata 3, 88400 Konjic

Tel.: +387 61 610 127

E-mail: vipkkonjic@gmail.com

Web : www.vipk.info

Facebook: www.facebook.com/groups/220690771277915/

KONJIC: NVO „Volonteri i prijatelji konjičke regije“ obilježili Međunarodni dan volontera i 10 godina svoga rada

Međunarodni dan volontera 5.12. i desetu godinu svoga djelovanja NVO „Volonteri i prijatelji konjičke regije“ (VIPK), obilježili su 3. decembra u prostorijama Doma izviđača. Tim povodom novinari portala novikonjic.ba razgovarali su sa predsjednikom Udruženja Adisom Muhibićem.

NK: Kratko nam predstavite VIPK?



MUHIBIĆ: „Imam zadovoljstvo da predvodim najjaču NVO „Volonteri i prijatelji konjičke regije“, koja je osnovana s namjerom da razvija građanski aktivizam, humanizam i odgovornost u najširem smislu riječi. U proteklih deset godina kroz raznovrsne aktivnosti, gradu smo poklonili preko 8.000 volonterskih sati. Svojim iskrenim i nadasve humanim djelovanjem zadobili smo povjerenje i poštovanje mnogih u Konjicu i šire. Posebnu pažnju plijeni naša upornost i istrajnost koju smo nesumnjivo pokazali u preko 60 akcija u kojima je učestvovalo preko 5.000 sugrađana. Ne samo što smo svojim humanitarnim

akcijama i beskompromisnim građanskim inicijativama uzburkali malu sredinu kao što je Konjic, mi smo postali vrijednost zajednice koja je dobrotom i odlučnošću uklanjala toksične situacije u našem društvu povezane sa ugrožavanjem osnovnih ljudskih prava, sigurnošću i birokratizmom lokalne administracije i vlasti na drugim nivoima.“

NK: Kako ocjenjujete pređeni put od 10 godina?

MUHIBIĆ: „Taj put ocjenjujem izuzetno uspješnim. Uspjeli smo da iz neformalne grupe prerastemo u pravni subjekt i time ojačamo svoj status i ugled u zajednici. Na tom putu nismo imali podršku konjičke lokalne vlasti kao drugi, iako mislimo da smo je zaslužili. Naše vrijednosti i dostignuća više su djelili i priznavali naši Konjičani, ali i obični ljudi, građani i organizacije iz drugih gradova BiH i naše dijaspore. Dok su oni, birokrati, gradili betonske mostove da spajaju obale, mi smo gradili tople ljudske priče koje spajaju ljude. U svakoj situaciji bili smo i ostali oni što pomažu ljudima, a to je najteže.“

NK: Šta biste izdvojili kao najbitnije u radu VIPK?

MUHIBIĆ: „Konjički volonteri afirmišu sve pozitivne ljudske vrijednosti i iz pepela podižu najvažnije socijalne resurse: solidarnost i povjerenje. VIPK danas čine članovi svih nacija, generacija, zanimanja, različitih svjetonazora i političkih opredjeljenja. Za nas najbitnije je da smo mlade okupili i usmjerili ka rješavanju problema u svojoj lokalnoj zajednici. VIPK je do sada uspio vlastima i medijima skrenuti pažnju na konjičke nepravde, kao i na zapostavljene vrijednosti. Uspio je lokalnu i širu javnost senzibilirati za problem konjičke djece, mladih, posebno socijalno i zdravstveno ugroženih pojedinaca i grupa. Uspio je nadležne institucije „natjerati“ da rade na rješavanju problema običnog čovjeka. Iz dana u dan svojim nadahnutim radom i zalaganjem dajemo snagu i drugim pojedincima i organizacijama da nastave borbu u svojim sredinama. Danas smo sinonim za pronalazak rješenja o otklanjanje problema koji tišti običnog čovjeka u Konjicu. Za mnoge institucije i organizacije, postali smo neko kome se vjeruje i ko zaslužuje

podršku zajednice. Naš inspirativni volonterski rad je praktično djelovanje kriminološke teorije „polomljenih prozora“ (Vilson i Keling, 1982.).“

VIPK Konjicu daje prepoznatljivu dodatnu društvenu vrijednost kojom se podiže kvalitet života pojedinca, odnosno unapređuje razvoj društvene zajednice. Oni to postižu doprinoseći zaštiti i promociji ljudskih prava, prava lica sa invaliditetom, djece s poteškoćama razvoju, zaštiti i promociji nacionalnih manjina, jednakosti i ravnopravnosti u borbi protiv diskriminacije, aktivnosti djece i mladih, razvoju volonterstva, humanitarnih aktivnosti, promociji umjetnosti, obrazovanja, kulture.

Za deset godina stekli su ugled i poštovanje koje je trebalo zaslužiti. Širom Bosne i Hercegovine izgradili su pozitivan imidž i osvojili brojne nagrade i priznanja od kojih izdajamo: titulu najboljih volontera Bosne i Hercegovine (“BHVP-2008”, “BHVP-2009”); priznanje “Grad mladosti 2011”; Zahvalnicu antikorupcijske mreže ACCOUNT 2013; Zahvalnica Ombudsmena BiH 2014.; Zahvalnicu “Dobro je biti dobar” Mozaik 2014.; “Heroji su među nama 2014”; Coca-cola, Klix.ba, Gracija; “Šampioni volonterizma”, USA Ambasada u BiH, 2015.“ i brojne druge. Članovi ovog Udruženja se stalno edukuju i jačaju. Do sada su učestvovali u radu preko 100 seminara, naprednih treninga, radionica, okruglih stolova, javnih tribina iz oblasti ljudskih prava, civilnog društva, nenasilne komunikacije, jačanja vladavine prava i borbe protiv korupcije, pisanja projekata, timskog rada, koje su organizovali TACSO BiH, CPCD, TI BiH, ADI, OSCE i dr. u Bosni i Hercegovini i susjednim državama.

VIPK nastavlja svoju pozitivnu priču i nikada neće prestati ukazivati na teme o kojima drugi šute, zbog karijere, straha ili interesa. Čovjekoljublje, osmijeh, optimizam, nada, pravda, upornost, solidarnost, mostovi i sunce njihovi su simboli. Volonteri nastavljaju Konjic uljepšavati u svakom pogledu, a članovima OV i svojim sugrađanima poručuju: „Gradimo zajednicu zajedno i učinimo Konjic najljepšim mjestom življenja. Mladi ostajte ovdje, ali ne zaboravite da se bolje sutra pravi već danas“. **M. Čukle/novikonjic.ba**





Institut za razvoj mladih KULT

Ul. 4. viteške brigade 34-36 BA, 71210 Ilidža, Sarajevo

E-mail: kult@mladi.org

Tel.: +387 33 778 778; Fax: +387 33 778 779

Web: www.mladi.org

Treba nam poslovno okruženje u kojem će mladi ostajati

Nagomilani problemi u privredi moraju se početi riješavati odmah, jedna je od poruka Biznis foruma „Rasterećenjem privrede do novih radnih mjesta“ održanog 15. decembra u hotelu „Mellain“ u Tuzli.



Biznis forum okupio je predstavnike resornih institucija vlasti, stručnjake iz oblasti ekonomije, poslovnog okruženja i zapošljavanja, privrednike iz uspješnih preduzeća Tuzlanskog kantona, te mlade poduzetnike. Kako je zaključeno tokom održavanja Forumu, Bosnu i Hercegovinu napušta sve više radno produktivnog stanovništva, a mjere koje država trenutno nudi nisu dovoljne da spriječe odlazak. Sugerisano je i da se identifikuje pet ili deset ključnih problema i da se odredi vremenski period u kojem će biti riješeni, jer kako je naglašeno, vremena za čekanje više nema.

“Mladi mogu uspjeti u poslovnom svijetu ali samo ako sistem čvrsto stoji na “tri noge”. Jedna je poslovna zajednica, jedna fakultet, a jedna je lokalna zajednica.” – poručila je mladima i predstavnicima vlasti Vedrana Ajanović iz BIT Centra Tuzla.

Akcentat panelista, ali i privrednika, bio je na teretima koji ograničavaju rast i razvoj privrede u Bosni i Hercegovini.

Kako je istakao premijer Vlade Tuzlanskog kantona Bego Gutić, ovaj kanton već je okrenut ka privrednicima i rješavanju problema sa kojima se suočavaju, a krajnji cilj je kreirati okruženje iz kojeg mladost neće odlaziti.

Tokom Forumu se govorilo o visokim procentima nezaposlenosti, problemima sa parafiskalnim nametima i porezom na dodanu vrijednost, budžetskim poticajima, ali i o načinima podrške novim biznisima i samozapošljavanju.

“Vrlo je značajno što se tokom Forumu nije samo govorilo o problemima u poslovnom okruženju, već i rješenjima. Važno je i da se o problemima govori u svim bh. gradovima, jer se privrednici u svim sredinama suočavaju sa sličnim problemima. Bitno ih je saslušati, ali im i pomoći u prevazilaženju trenutne, za njih nepovoljne situacije” – poručila je Ajka Baručić, ekonomska ekspertica u Institutu za razvoj mladih KULT.

Cilj organizovanja Forumu bio je pokrenuti konstruktivan dijalog o pitanjima unapređenja poslovnog okruženja i prilika za zapošljavanje, kako u Tuzlanskom kantonu, tako i u cijeloj Bosni i Hercegovini.

Biznis forum „Rasterećenjem privrede do novih radnih mjesta“ organizuje Institut za razvoj mladih KULT uz podršku Vlade Tuzlanskog kantona i Ministarstva razvoja i poduzetništva Tuzlanskog kantona, a u okviru inicijative "Poslovni prostor BH" koju vodi Institut za razvoj mladih KULT, a koja je dio Projekta održivosti civilnog društva u Bosni i Hercegovini (CSSP), koji realizuju Centri civilnih inicijativa (CCI) i

Centar za promociju civilnog društva (CPCD), a koji je podržan od Američke agencije za međunarodni razvoj (USAID).

Uručeni certifikati desetoj generaciji obuke „Uči, misli i djeluj!“



Institut za razvoj mladih KULT u decembru je organizovao dodjelu certifikata za učesnike desete generacije obuke „Uči, misli, djeluj!“.

UMiD obuku pohađalo je 24 učesnika/ca iz oba entiteta, a tokom šest mjeseci učili su o građanskom aktivizmu i volonterstvu, demokratskim principima, ljudskim pravima, pisanju projekata, timskom radu i liderstvu, javnom zagovaranju, mirnom rješavanju konflikata...

„Ja vidim ogromnu razliku u sebi sada i prije obuke. Samostalija sam, mnogo bolje informisana i stekla

sam vještine koje mi formalno obrazovanje ne nudi. Zahvaljujući obuci stekla sam i nove prijatelje, ali i prevazišla brojne predrasude.“ – istakla je Jasmina, jedna od polaznica obuke.

Jednogodišnji program obuke omladinskih lidera/ki UMiD (Uči, misli i djeluj!) koji realizuje Institut za razvoj mladih KULT, polaznicima/ama, između ostalog, nudi mogućnost da steknu samopouzdanje, sagledaju svoje sposobnosti i potencijale, te razviju osjećaj za odgovornost u društvu i steknu vještine upravljanja i bavljenja biznisom.

Obuka je priznata od Ministarstva za obrazovanje Kantona Sarajevo, te brojnih općina u BiH.

Obuka koja vraća vjeru u mlade

U decembru je održan peti modul osnovne Obuke službenika/ca za mlade koju organizuje Institut za razvoj mladih KULT. U okviru ovog modula službenici/ce za mlade govorili su o temama volontiranja, rješavanja sukoba u radu, monitoringa i evaluacije javnih poziva.

Kroz temu volontiranja razgovarali su o vrijednostima volontiranja, zakonskim rješenjima za volontere, te o njihovim iskustvima u volontiranju. Kako su istakli, tema monitoringa i evaluacije javnog poziva je vrlo korisna za kreiranje javnog poziva, te za rad u općinama pri monitoringu omladinskih organizacija.

"Nova znanja koja nudi obuka mnogo mi pomažu u svakodnevnom poslu. Spoznala sam put za rad sa udruženjima mladih, te upoznala vrijedne i kreativne ljude“ – istakla je službenica za mlade iz Tuzle.



Prema riječima službenice za mlade iz Širokog Brijega, obuka je od izuzetnog značaja u procesu približavanja rada gradske uprave mladima, ali joj pomaže i u poboljšanju pristupa u radu s mladima. Kako je istakla, ova obuka joj je vratila vjeru u mlade.

Obuka službenika/ca ima cilj da se polaznici/e osposobe za samostalno obavljanje poslova službenika/ca sticanjem certifikata o znanju o politici prema mladima i radu s mladima, te da osobe koje u državnoj službi obnašaju ili će obnašati funkciju i poslove službenika/ca budu stručno osposobljene za rad s mladima, uz posjedovanje stručnih kompetencija i certifikata neophodnih za obavljanje te pozicije u organu državne službe.

Program obuke održava se u partnerstvu sa Federalnim ministarstvom kulture i sporta, po čijem se pravilniku obuka i provodi, a u suradnji sa Centrom Olof Palme.

Mladi u BiH žele volontirati!

U Obrazovno-raznodnom centra za mlade SPAJALICA održavanjem edukativne radionice za srednjoškolce obilježen je Međunarodni dan volontera.

Učenci Četvrte gimnazije Ilidža sa vršnjačkom edukatoricom Eminom Ždero, razgovarali su o značaju volontiranja, izgradnji karaktera i vještina volontiranjem, ali i Zakonu o volontiranju u FBiH, te pravima volontera koje Zakon štiti.



„Obećavajući su podaci da bi 60% mladih ljudi u Bosni i Hercegovini svoje slobodno vrijeme iskoristilo za volontiranje. To je pokazatelj da još uvijek gajimo duh društveno korisnog aktivizma.“ – istakla je Semina Ždero, vršnjačka edukatorica.

Volontiranje u Bosni i Hercegovini regulisano je Zakonom o volontiranju FBiH i Zakonom o volontiranju RS-a, a partner na izradi Zakona o volontiranju FBiH bio je Institut za razvoj mladih KULT.

Generalna skupština Ujedinjenih nacija je 1985. godine proglasila 5. decembar za Međunarodni dan volontera, kao podsjećanje na dan kada je 1970. stvoren Program UN za volontere.



Omladinsko udruženje Nova vizija

Ul. Opara bb, 72290 Novi Travnik

Tel./fax: +387 61 309 687, +387 61 593 773

E-mail: ounovavizija@gmail.com

Facebook: <https://www.facebook.com/ounovavizija>

U prostorijama Omladinskog centra Novi Travnik održana je edukativna radionica na temu "Diskriminacija". Radionica je realizovana u saradnji OU Nova vizija i misije OSCE-a, kancelarije u Travniku. Na radionici su sudjelovali učenici Srednje škole Novi Travnik, Mješovite srednje škole, studenti i volonteri/ke Nove vizije. Mladi su u sklopu interaktivne radionice imali priliku da razgovaraju o njihovom viđenju pojma diskriminacije, mehanizmima zaštite i vrstama diskriminacije. Ovo je bilo prilika da mladi analiziraju primjere s kojima se svakodnevno suočuju, ali i da sudjeluju u kvizu o prepoznavanju diskriminacije. Jedan od najčešćih problema s kojima se suočava javnost, jeste nejasno definisanje diskriminacije i posljedica koje nastaju uslijed diskriminacije.



Nedovoljno poznavanje posljedica i mehanizama zaštite od diskriminacije često je razlog zbog kojeg mladi nisu svjesni ove negativne pojave.

Iako je radionica trajala dva sata, mladi su bili prepuni pozitivne energije, bili aktivni tokom radionice, ali i poslali jasnu poruku da ova negativna pojava zaslužuje više pažnje i što bolju percepciju javnosti o ovom problemu.



Hvala učenicima/icama Mješovite srednje škole, Srednje škole Novi Travnik, hvala predstavnicama misije OSCE-a ureda u Travniku na doprinosu realizacije ove priče kao i našim volonterima/kama i predstavnicima Centra za socijalni rad Novi Travnik.

Zajedno realizujemo ideje mladih- Nova vizija.



H.O. MUSLIMANSKO DOBROTVORNO DRUŠTVO – MERHAMED DOBOJ

Ul. Kralja Aleksandra 17, 74000 Doboje

Tel./fax: +387 53 226 886

E-mail: merhamet.doboj@cutuk.net

FB: www.facebook.com/Merhamet-Doboj



Predsjednica "Merhameta" Dobojević - Avdić Faketa prisustvovala je u Banskim dvorima u Banja Luci dodjeli priznanja za dan volontera „Merhametu“ Dobojević i posebno priznanje mobilnoj medicinskoj sestri Zlati Mehičić. Već treću godinu zredom „Merhamet“ Dobojević dobija priznanje.



Volonterka "Merhameta" Dobojević Semra Jašarević prisustvovala je povodom Međunarodnog dana borbe protiv korupcije 9. decembra 2016. godine, gdje je održana javna debata na temu "Unapređenje pravnog okvira za suprotstavljanje korupciji i diskriminaciji prilikom zapošljavanja u javnom sektoru u BiH", u hotelu Integra u Doboju, u zajedničkoj organizaciji Centra za razvoj civilnog društva u BiH i UG Justicia. Također je simbolično obilježen i Međunarodni dan ljudskih prava

10. decembar 2016. godine.



Predsjednica "Merhameta", Avdić Faketa prisustvovala javnom govoru "Zločin mržnje i govor mržnje" Koji je prezentovala Asocijacija demokratske inicijative (ADI)

Predsjednica "Merhameta" prisustvovala okruglom stolu na temu: "Analiza stanja primjene pravilnika o internom prijavljivanju korupcije i načinu zaštite lica koja prijavljuju korupciju."



Održan okrugli sto regije osoba sa invaliditetom na temu „Izazovi u ostvarivanju prava na medicinska, ortopedska i druga pomagala u Republici Srpskoj i Ze-Do Kantonu“. Prisustovala predsjednica "Merhameta" Avdić Faketa.



Aktivisti "Merhameta" Doboj uspješno završili 2016. godinu. 31.12.2016. godine na -11 stepeni, u subotu uoči nove godine vrijedni aktivisti "Merhameta" vrše raspodjelu humanitarne pomoći za 400 porodica i 270 paketića za djecu. Slike br.



Sretnu i uspješnu Novu godinu od srca Vam žele aktivisti „Merhameta“ Doboj.





OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH

Tel./Fax: +387 49 211 032

E-mail: svitac@gmail.net

Web: www.svitac.org

FB: www.facebook.com/omladinska.svitac

Dnevne radionice



Omladinska organizacija Svitac je u decembru nastavila sa svakodnevnim aktivnostima. Učesnici su podijeljeni u dvije grupe, uzrast 4-7 godina svakim danom od 11:00-13:00, a uzrast 8+ od 14:00-15:30 časova. Koordinatorica jutarnjih radionica je pripremila plan aktivnosti sa raznovrsnim temama, kao što su planete i svemir, karneval životinja, razvrstavanje boja i oblika, gdje su mali učesnici imali priliku da nauče više o planetama i solarnom sistemu, te o životinjama koje žive u raznim dijelovima svijeta. Takođe su slušali dječije pjesmice namijenjene njihovom uzrastu kako bi na taj način vježbali ritmiku i polako usvajali tekst.

Posebna pažnja se poklonila dječijoj pjesmici "Djeda Mraze ne skreći sa staze" koja je izvedena na Novogodišnjoj priredbi. Budući da skoro svake sedmice dođe novi član, grupa svakog četvrtka vježba i ponavlja već naučene brojeve koristeći radne listove za bojenje, te ponavlja oblike i boje na engleskom i njemačkom. Materijali koji su se koristili za realizaciju ovih radionica su voštane boje, flomasteri, drvene i vodene bojice, kolaž papir i blokovi za crtanje. Cilj ovih aktivnosti kao i do sada je da djeca razviju maštu i da koristeći razne materijale izraze svoju kreativnost, takođe da razviju motoriku i poštovanje prema drugom i usvoje lijepo ponašanje. U decembru je do 25 učesnika pohađalo jutarnje dnevne radionice.

Poslepodnevna grupa prati raspored koji je svaki dan drugačiji, pokušavajući obuhvatiti što više različitih tema i aktivnosti. (uzrast 8+).

Ponedjeljkom su radionice kreativnog izražavanja, utorkom engleski jezik, komunikacija, izgovor, te razne igre koje pospješuju učenje stranog jezika u grupi. Grupa je i ovaj mjesec, pored gramatičkih zadataka, vježbala komunikaciju na engleskom jeziku, te su usvajali novi vokabular. Srijeda je dan za muziku i pjevanje, učenje osnova na muzičkim instrumentima gitari i klaviru, uključujući teoriju muzike za početnike i čitanje nota. Svakog četvrtka starija grupa je podijeljena u dvije manje i učesnici imaju mogućnost da se okušaju u društvenim igrama i timskom radu, razvijajući osjećaj za poštovanje drugog, socijalizaciju i fer igru. Petkom su radionice njemačkog jezika kao i dan za pomaganje u izradi domaće zadaće.



Radionice se održavaju u Omladinskom centru Brčko distrikta. Koordinator radionica u decembru je bila Slađana Bašić uz asistenciju lokalnih i Weltwaerts i EVS međunarodnih volontera Alexandera Likica iz Njemačke, Sanele Sinanovic iz SAD-a, Mahmuta Taha Bicera i Yunusa Seckina iz Turske, te Monice Reeves, Eleonore Pearson, Bena Owensa i Catherine Rolley iz Velike Britanije. Broj učesnika starije grupe je trenutno između 15 i 20 učesnika.

„Pričajmo njemački“ – radionice komunikacije na njemačkom jeziku sa izvornim govornicima



Radionice njemačkog jezika se održavaju svakog četvrtka u prostorijama Omladinskog centra Brčko distrikt od 17:30-19:30 časova. Grupa trenutno radi na gramatici za početni i srednji stepen i obrađuje teme iz svakodnevnog života. Radionice komunikacije na njemačkom jeziku su namijenjene za sve koji žele naučiti osnove gramatike, ali i usavršiti već postojeće znanje i steći nova iskustva i poznanstva. U decembru je grupa radila na tekstovima prilagođenim njihovom znanju, te su vježbali korištenje određenog i neodređenog člana, i sadašnje gramatičko vrijeme. Koordinator projekta je međunarodni volonter iz Njemačke Alexander Likic. Radionice je u decembru

pohađalo 10 učesnika (dvije grupe).

„I love English“ – radionice komunikacije na engleskom jeziku sa izvornim govornicima.



Radionice engleskog jezika se održavaju svake srijede u prostorijama Omladinskog centra Brčko distrikt od 19:00-20:00 časova. Radionice komunikacije na engleskom jeziku su namijenjene svima koji žele naučiti osnove gramatike, upotrebu svakodnevnih fraza i drugih elemenata, ali i usavršiti već postojeće znanje i steći nova iskustva i poznanstva. U decembru su učesnici radionica radili na planiranju interaktivne radionice koja će se održati početkom januara, gdje će učesnici pokazati usvojena znanja. Koordinator projekta je međunarodna volonterka iz Velike Britanije Monica Reeves. Radionice je u decembru pohađalo 10 učesnika.

„Love Art?“ – radionice kreativnog izražavanja za uzrast 16+

Radionice kreativnog izražavanja se održavaju svakog utorka u prostorijama Omladinskog centra Brčko distrikt od 19:00-20:00 časova. Ove radionice, koje su počele u novembru su namijenjene za sve koji vole umjetnost i istoriju umjetnosti, te crtanje, slikanje i druženje uz diskusiju. Učesnici su imali priliku da se bolje upoznaju sa koordinatorom projekta, te da rade na temi surealizam, crtanje portreta i kolaž. Koordinator projekta je međunarodna volonterka iz Velike Britanije, Eleonore Pearson. Radionice je u decembru pohađalo 5 učesnika.



„Freeleticx“ – sportske radionice

Sportske radionice se održavaju utorkom i četvrtkom od 21:00-22:00 časova u prostorijama Omladinskog centra Brčko distrikt i namijenjene su mladim ljudima koji žele da poboljšaju motoriku, kondiciju i tjelesnu snagu, te da steknu nove vještine i poznanstva. Koordinator projekta je Miloš Popić.

Radionice gitare

Učesnici radionice gitare u decembru su nastavili uvježbavati etide i kompozicije Rolanda Dyensa, Carla Domeniconija, Franciska Tarrrege, Fernanda Sora, kao i duete Francisa Kleynjansa i Johna Dowlanda. Novi polaznici su se nastavili upoznavati sa osnovama instrumenta.

Radionice sambe

Učesnici ove radionice su nastavili uvježbavati kompozicije Hafla i Van Harte Pardon, koje su izveli na novogodišnjoj priredbi krajem decembra.

Dan ljudskih prava

Omladinska organizacija Svitac je u decembru realizovala interaktivnu radionicu na temu „Ljudska prava“. Sa jutarnjom grupom (uzrast 4-7-) je održana diskusija prilagođena njihovom uzrastu o ljudskim pravima, a grupa je takođe dobila i pitanja šta smiju, a šta ne smiju raditi. Nakon razgovora učesnici su imali priliku da pogledaju slike iz ilustrovane knjižice o ljudskim pravima za djecu: „Human Rights Education toolkit for Children: Play it fair“.

Ilustracije su prilagođene dječijem uzrastu i obrađene na temu : pravo na školovanje i obrazovanje, pravo na druženje i jednakost , pravo na izražavanje i iznošenje svojih ideja i mišljenja i pravo da ne odgovaraju ili da ne budu kažnjeni za ono što nisu uradili.

Za stariju grupu učesnika (uzrast 8+) je održana diskusija na temu „Ljudska prava“, te su odgovarali na pitanja šta znaju o tome ko je i kada sastavio Opštu deklaraciju ljudskih prava. Nakon toga, grupa je dobila zadatak da nacrtaju po jedan list sa drveća i napiše na njemu neko pravo koje je svakome iz grupe najbitnije i te listiće zalijepi na nacrtano drvo kako bi se stvorila bogata krošnja ljudskih prava.

Inicijativa: AKTIVNI DANAS

Omladinska organizacija Svitac se pridružila Inicijativi Aktivni i danas te je 14.12. u sklopu svojih dnevnih aktivnosti (kreativne i muzičke radionice) sa grupama uzrasta 4-7 i 8+ realizovala promo video za socijalne mreže, kako bi pokazali raznolikost svakodnevnih aktivnosti za sve uzraste.

Video možete pogledati ovdje: <https://www.youtube.com/watch?v=waoJA0zEjlg>

U večernjem terminu Svitac je u saradnji sa AsuBiH–Lokalni tim Brčko organizovao promociju svojih aktivnosti za uzrast 16+.

Nakon obilaska promo štandova održana je diskusija sa učesnicima na temu –Aktivizam i volontiranje u lokalnoj zajednici, te je promovisan omladinski aktivizam. U toku diskusije ukazano je koliko su mladi uistinu aktivni, te se vodio razgovor o uticaju lokalnih vlasti, kao i njihov odnos prema omladinskim organizacijama koje rade sa mladima. Učesnici su takođe imali priliku razgovarati o tome koliko su zaista bitni projekti ili aktivnosti koje se realizuju u njihovom gradu i šta bi se moglo promijeniti ili prilagoditi njihovim potrebama, te o programu EVS (Evropski Volonterski Servis).

Novogodišnja zabava

Omladinska organizacija Svitac je projekat „Tolerancija i kulturna raznolikost kroz muziku, umjetnost i sport u 2016“, koji je finansirala Vlada Brčko distrikta, zvanično zatvorila 16.12. eventom „Novogodišnja zabava“, koji se održao u prostorijama Omladinskog centra. Prvi dio je bio namijenjen za uzrast 4-7 godina od 11-13 časova, gdje su mališani imali priliku da učestvuju u raznim igrama, te da zajedno pogledaju crtane filmove sa novogodišnjom temom i prime paketiće od Djeda Mraza. Drugi dio Novogodišnje zabave je počeo u 18:00 časova za uzrast 8+. Uz pomoć međunarodnih i lokalnih volontera, Omladinska organizacija Svitac je organizovala zanimljiv program za učesnike radionica, njihove prijatelje i roditelje. U prvom dijelu programa su predstavljene muzičke aktivnosti, klasične kompozicije na gitari i flauti, zatim mali hor i muzička pjevačka grupa, sa izvedbama na engleskom jeziku. U drugom dijelu zabave su održane dvije stanice gdje su učesnici imali priliku da učestvuju u raznim igrama, face paintingu ili da ukrase drvo želja ručno napisanim željama. U velikom holu Omladinskog centra je postavljena izložba svih radova, koji su nastali u proteklim sedmicama projekta. U završnom dijelu zabave se održala tombola i razne nagrade, te je upriličena i zakuska za goste. Novogodišnju zabavu je posjetilo više od 120 gostiju.



Za januar se planira nastavak svih redovnih radionica Omladinske organizacije Svitac.



SAOPŠTENJA/INFORMACIJE/DONATORI/ POZIVI

Podrška za organizacije civilnog društva

Akcija Jugoistočna Europa objavila je ovaj Poziv za aplikacije za pružanje podrške organizacijama civilnog društva za promicanje dobre uprave i vladavine prava kroz program dodjele grantova otprilike 25-30 malih potpora za organizacije civilnog društva iz Makedonije, Srbije, Bosne i Hercegovine, Crne Gore, Albanije i Kosova (5-6 potpora po zemlji), kroz sljedeće dvije vrste potpora, u **rasponu od 6.000 eura do 8.000 eura po grantu:**

1. Podrška za lokalnu OCD za obavljanje inicijativa unutar jedne zemlje.
2. Podrška OCD za obavljanje inicijativa između dvije ili više zemalja iz regije.

To će pružiti podršku za ciljne zagovarače kampanje i političke inicijative koje će pridonijeti ostvarenju sljedećih ukupnih ciljeva akcije jugoistočne Europe:

- Jačanje uključenosti civilnog društva i medijskih organizacija u stvaranju javnog mnijenja, politike i sudjelovanja u mehanizmima odlučivanja;
- Povećanje kapaciteta civilnog društva za izgradnju svoje izborne jedinice i rješavanje istaknutih problema

Očekuje se da će se inicijative podržane Malim grantovima usredotočiti na rješavanje vladavine prava i pitanjem dobrog upravljanja, posebice borbu protiv korupcije, transparentnost i pristup informacijama, zaštitu podataka i korištenje javnih sredstava, u okviru sljedećih ciljanih područja:

- Slobodan pristup Zakonom o javnim aktima (Freedom of Information - FOI)
- Financiranje političkih stranaka
- Korupcija procedure javne nabave
- Praksa podmićivanja
- Pravila i sigurnost
- Darovi / Sponzorstvo
- zabrinutosti vezane za izbore
- povredu dužnosti

Potpore će se usmjeriti prvenstveno manje OCD u cilju pružanja iskustvo učenja i pomoći im izgraditi svoje kapacitete prikupljanja sredstava i nakon toga sudjelovati u grant pozivu od strane EU i drugih donatora. Nadalje, bit će potrebno partnerstvo s najmanje jednim medijem.

Potpuni opis poziva, kao i prijavne obrasce možete naći na sljedećim linkovima.

- [Call to support the actions of networks of civil society organizations](#) (ažurirana verzija 23.12.2016: Izvješće o reviziji - opcionalno za organizacije sa preko 30.000 eura godišnjeg prometa; Jedna organizacija može prijaviti samo jednu projektnu aplikaciju kao vodeći podnositelj zahtjeva)
- [Application Form Aplikaciona forma](#)
- [Budget Form Forma budžeta](#)
- [Implementation Timeframe Form Forma vremenskog okvira implementacije](#)

Rok za podnošenje potpunih prijava: **15.01.2017. u 16:00 sati**, isključivo putem online obrasca za prijavu. Obrasci za prijavu se moraju poslati na engleskom jeziku.

Više informacija na: http://metamorphosis.org.mk/en/aktivnosti_arhiva/request-for-applications-grants-for-civil-society-organizations/

Poziv za projekte Ekumenske inicijative žena

Ekumenska inicijativa žena objavljuje novi javni poziv za predaju projektnih prijedloga iz područja:

- mira i pomirenja
- ekumenskog i međureligijskog dijaloga
- ženskih ljudskih prava

Jednako tako mogu sudjelovati i projektni prijedlozi koji uključuju prekograničnu suradnju unutar geografskoga područja djelovanja EIŽ-a.

Prijaviti se mogu:

- organizacije civilnoga društva i grupe djevojaka koje djeluju u Hrvatskoj, Bosni i Hercegovini, Crnoj Gori, na Kosovu, u Makedoniji ili Srbiji, a čiji godišnji proračun ne prelazi HRK 375.000/ EUR 50.000
- teologinje i studentice teologije koje djeluju u Hrvatskoj, Bosni i Hercegovini, Crnoj Gori, na Kosovu, u Makedoniji ili Srbiji

Iznos ukupnih sredstava koja će se dodijeliti: do HRK 755.000/ EUR 100.000

Visina pojedinačne potpore: do HRK 30.000 / EUR 4.000 ili HRK 52.500 / EUR 7.000

Rok za prijavu: 18. 1. 2017. do 15 sati.

Detaljnije informacije, kao i natječajnu dokumentaciju, možete pronaći [OVDJE](#).

JAVNI POZIV – ORGANIZACIJSKA POTPORA

Ekumenska inicijativa žena objavljuje novi javni poziv za dodjelu organizacijske potpore **organizacijama civilnoga društva:**

- koje su do sada primile najmanje tri projektne potpore Ekumenske inicijative žena
- kojima prosječni godišnji proračun ne prelazi HRK 375.000 / EUR 50.000

Iznos ukupnih sredstava koja će se dodijeliti: do HRK 60.400 / EUR 8.000

Visina pojedinačne potpore: do HRK 30.000 / EUR 4.000

Rok prijave: 18. 1. 2017. do 15 sati.

Detaljnije informacije, kao i natječajnu dokumentaciju, možete pronaći [OVDJE](#).

Erasmus+: Otvoren prvi rok za apliciranje u 2017.

Projekti za izgradnju kapaciteta u polju mladih pokrivaju široku lepezu aktivnosti i ohrabruju suradnju između organizacija koje se bave mladima, obrazovanjem, neformalnim obrazovanjem i drugim sektorima u Programskim i Partnerskim zemljama iz različitih dijelova svijeta.

Ovi projekti trebaju prepoznati i unaprijediti omladinski rad, neformalno obrazovanje, volontiranje i stvarati vezu između obrazovanja i tržišta rada. Istovremeno, projekti trebaju podržati regionalnu i transnacionalnu suradnju i mobilnost mladih, te ohrabriti mlade na učešće u društvu.

Za više informacija pratite Voduč za program Erasmus Plus, sa posebnom pažnjom na stranice namijenjene Partnerskim zemljama. Vodič možete naći na linku [Erasmus+ Programme Guide](#).

Primjeri aktivnosti za izgradnju kapaciteta u polju mladih su:

- Konferencije, radionice i sastanci
- Događaji sa velikim brojem mladih
- Informativne kampanje
- Razvoj komunikacijskih i media alata
- Razvoj metoda, programa i dokumentata poput [Youthpass](#)



- Otvoreni i fleksibilni materijali za učenje, virtuelna suradnja, otvoreni resursi za učenje i sl.

Projekti trebaju:

- Promovirati suradnje između :
 - omladinskih organizacija i vlasti u Partnerskim zemljama
 - omladinskih organizacija koje se bave obrazovanjem i poslovnog sektora i tržišta rada
- Jačati vijeća i savjete mladih, omladinske platforme i vlasti u Partnerskim zemljama (lokalno, regionalno i na državnom nivou)
- Podržavati rad omladinskih organizacija u Partnerskim zemljama
- Pomoći provedbu praksi omladinskog rada koja uključuje:
 - alate za razvoj omladinskih radnika i trenera,
 - metoda neformalnog obrazovanja koje unaprijeđuju vještine,
 - nove trenerske alate, prilagodljive treninge i virtuelnu mobilnost,
 - vršnjačko učenje koje unaprijeđuje liderstvo u omladinskim organizacijama

Projekti mogu trajati od 9 mjeseci do dvije godine a najveći iznos granta je 150.000 Eura.

Rok za predaju projekata je 8.3.2017. u 12.00 po briselskom vremenu za projekte koji počinju od 1. do 31. 12.2017.

Za više informacije pratite zvaničnu stranicu Izvršne agencije

: http://eacea.ec.europa.eu/home/erasmus-plus/actions/key-action-2-cooperation-for-innovation-and-exchange-good-practices/capacity_en

Više informacija: <http://erasmusmladi.ba/otvoren-prvi-rok-za-apliciranje-u-2017/>

Nagradna igra RIO priče sa putovanja i Experience BiH

Rok prijave 15.01.2017

“Naše iskustvo je počelo još 2005. godine, kada smo i sami učestvovali u programu studentske razmene Work and Travel USA. Nakon nezaboravne ljetnje avanture, poželjeli smo da i drugi ljudi dožive i iskuse život, rad, samostalnost, odgovornost, multikulturalnost...i tako se rodila ideja o Experience-u. Počeli smo od 2012. godine sa osnivanjem Experience d.o.o da pružamo šansu mladima iz BiH da iskuse nešto novo i nesvakidašnje.”

Ovako svoju priču počinju u ovoj popularnoj W&T agenciji, koja godišnje pošalje više stotina zadovoljnih studenata u Ameriku.

Danas Experience pored inicijalnog programa studentske razmjene Work and Travel USA, pruža mladima i mogućnost stručnog usavršavanja kroz programe Internship i Training USA, kao i najpouzdaniju uslugu povraćaja poreza iz SAD.

Sa zadovoljstvom pomažemo kandidatima da dođu do novog i neprocenjivog iskustva na najbolji i najlakši način, jer iz ličnog iskustva razumijemo potrebe i želje kandidata. Mi smo prošli kroz ovu nezaboravnu avanturu, a sada želimo da je podelimo sa drugima.

Experience BiH je trenutno jedina agencija u BiH koja dovodi američke poslodavce u našu državu. Svim studentima se posvećuje posebna pažnja u toku njihovog procesa apliciranja kao i nakon odlaska u Ameriku, gdje se vodi računa na najsitnije detalje, kako bi svi učesnici programa bili maksimalno zadovoljni.

Kako se godinama sve veći broj studenata prijavljuje za odlazak u Ameriku, Experience BiH ima jedno malo iznenađenje za sve čitaoce. Tačnije pet iznenađenja.

Povodom novogodišnjih praznika odlučili smo da organizujemo jednu nagradnu igru pod nazivom Experience nagradna igra, kako bi na neki način nagradili sve naše studente i pratiocce.

A pitate se koje su nagrade? Zar Vam nismo rekli da je ovo iznenađenje? Pet sretnih dobitnika imaće priliku da osvoji jedan od posebnih paketa koje poklanja Experience BiH.

Pravila za nagradnu igru

Kako bi učestvovali u nagradnoj igri potrebno da je da:

1. Lajkujte Facebook stranicu Experience work and travel (ukoliko niste)
2. Podijelite stranicu
3. Napišite u komentar koja vam se priča do sada najviše sviđjala i zašto volite putovati.

Napomena: Nagradna igra traje do 15.1.2017.

Za više informacija o programu, posjetite kancelarije:

Kancelarija Banja Luka

Adresa: Stepe Stepanovića 95A

Kancelarija Doboj

Adresa: Vojvode Mišića 54

Izvor: <http://www.hocu.ba/index.php/hocu.priliku/nagradna-igra-rio-price-sa-putovanja-i-experience-bih/>

Povjerenstvo za koordinaciju pitanja mladih u BiH

86. sjednica Vijeća ministara BiH održana je 20.12.2016. godine je razmatrano

POVJERENSTVO ZA KOORDINACIJU PITANJA MLADIH U BOSNI I HERCEGOVINI.

Vijeće ministara BiH, na prijedlog Ministarstva civilnih poslova, donijelo je **Odluku o osnivanju Povjerenstva za koordinaciju pitanja mladih u Bosni i Hercegovini, koje će procjenjivati stanje, napredak i potrebe omladinskog sektora u BiH.** Istovremeno će, između ostalog, predlagati nadležnim tijelima strateške reformske prioritete u omladinskom sektoru i davati preporuke za usklađivanje zakonodavstva u Bosni i Hercegovini u oblasti mladih. Članovi Povjerenstva bit će predstavnici Vijeće mladih Federacije Bosni i Hercegovine, Omladinskog savjeta Republike Srpske i omladinskog nevladinog sektora iz Brčko Distrikta Bosne i Hercegovine, kao i pomoćnici ministara za pitanja mladih u Ministarstvu civilnih poslova i entitetskim nadležnim ministarstvima te Brčko Distriktu.



Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

Adrese za slanje vaših informacija za mjesečni bilten:

**Omladinski resursni centar
Tuzla**

**Hadži Bakirbega Tuzlića 1
75000 Tuzla**

tel/fax: 035 258 077

e-mail: orcuzla@bih.net.ba

hcatuzla@bih.net.ba

*Mjesečni bilten uređuje
Omladinski resursni centar -
ORC Tuzla*

WEB stranica Mreže:

www.omladina-bih.net

Mejling lista Mreže:

posta@omladina-bih.net

Webmaster:

emir.delalic@gmail.com